

**REPUBLIC OF KIRIBATI**



**s21, 37(3) Disaster Risk Management and Climate Change Act 2019**

**s2, 16, 17, 18, 19, 20 Public Health Infectious Disease Regulation**

**CURFEW ORDER**

Ngai, **Te Beretitenti, Taneti Maamau**, iaan mwakau are I a tia n anganaki man te tua ae Disaster Risk Management and Climate Change Act ao Public Health Infectious Disease Regulation ao I kanakoa te tua aio ibukin waaki ake a rai ni iraki karaoaia iaon Tarawa Teinainano, Betio, Buota ao Butaritari ni kaineiti ma Alert Level 3 n aron aikai:-

1. Kainan te nakonako imarenan te aoa 8 n te tariki ni karokoa te aoa 5 n te moaningabong nte bong are imwina.
2. Ana tabo ni mwakuri ma ana kambwana te Tautaeka nako ana bane n uki ma a na bane n ira nanon SOP are a tia ni kaweneaki ibukiia. Aobitin Bootaki n Aro ma Ekaretia a kauangaki ba ana uki ngkanna a nora riaina ibukin kabutan aia waaki ao a na ira naba te SOP ibukiia aobiti.
3. Bitineti n aroia wholesalers ao titoa (retailers) ake a kabonakoi amwarake ao bwainaoraki a na teimatoa n uki ibukin te botanaomata imarenan te aoa 6 n te ingabong ni karokoa te aoa 7 n te tariki. A na raii naba n tarai a bwa e na iraki nanon te tau raroa ae 2 mita, rabunan te ubu ao kainibaire riki tabeua man Botakin te Mauri ao Katoki Aoraki (MHMS) inanon ao itinanikun aia titoa n taai nako.
4. Bitiniti ibukin rabwan kaa ma rebwerebwe, bwain kateitei, kareke birim, taan kateitei, taabo n amwarake ti ibukin te takeaway a na kona naba n uki ma

a na bane ira naba tuan te tau raroa are 2 miita, rabunan te ubu, aki babaware, aki ongiran te ngako ao tabeua riki.

5. E uki te akawa imarenan te aoa 5 n te ingabong nakon te aoa 7 n te tairiki ma bon ti aman taan karaun ke taan akawa iaon te booti ae a kariaiakaki. E taburoroko bwa ana aerake n abamakoro riki tabeua ma bon ti te tabo are a mwananga mai iai.

6. A na kona n buti bao ni mwamwananga ma a na riai n kamatoa bwa e na kabonganaaki rabunan te ubu iaon aia bao, te aki babaware ao ongiran te bwairi, e na uki taian winto ni kabane ao a na tekateka baatintia iaon kaintekateka akea te itobwatobwa ma te tei.

7. Reirei ni kabane a na bane n in ni karokoa manga katanoatakina. Ti reirei iaon Kiritimati, Tabuaeran ao Teraina ngkai e aki rangin nakoraoi te internet ao te rerio ibukin te angareirei.

8. Taabo ni mooi nangkona, mooi manging ao taabo n takakaro a na bane n in. E na teimatoa n tabuaki te bingko.

9. Bobotaki nako ni ikotaki ma taromauri a na kona ni waaki n aki raka iaon 20 te aomata ao a na boo itinaniku ao n ira tuan te tau raroa ae 2 mita, rabuna te ubu ao e na raoiroi butin ke ukin te ang iai.

10. Te nako n te onnaoraki ma kiriniki a kariaiakaki ni kaineti ma ana kainibaire te Botaki ibukin te Mauri ao Katoki Aoraki.

11. Mwamwanangaia kaibuke ao kiiba a bon kaukaki ibukin karokoan te bwaa, bwaai n aoraki ao kaako nako aonaba ri taari ao n te kibakiba ma akea bwatintia ae kariaiakaki. Bon ti bwatintia mai Tarawa ake a bae l aonnaba ae a na kariaiakaki n toka n oki nako Tarawa ma a na riai n ira naba nanon te kainibaire ibukin te mwamwananga ao man tia n koro itiia.

12. Te mwamwananga mai Tarawa ma Betio nakon abamwakoro ake a tuai roko iai te COVID-19 ea uki ma e na riai n anga ana kariaia te Kauntira n te abamwakoro anne moa rinanon te Botaki ni Makuri ibukin Tautaeka inanoa. Bwatintia mai Tarawa ma Betio a riai moa n tia n tuoaki bwa ana akea te COVID-19 irouia (negative) imwain mwanangaia nakon aba aikai. Taan mwamwananga ake aia ririki 18 ao iaona a na riai n tia n koro itia n totoko ibukin te COVID-19, aio are a katabeaki naba iai te tia kabuta te bao ni mwananga bwa e na kamatoa te itera aio. Ana kainibaire (SOP) Botakin te Mauri ao Katoki Aoraki (MHMS) riki ake tabeua ibukin te mwamwananga a na riai naba n iraki nanoia n tain te mwananga irouia bwatintia ao taan mwakuri n te bao ni mwananga.
13. A kabaeaki bureitiman ao ana taan mwakuri te Tautaeka ake a tia n mwiokoaki bwa a na tara nanon te Oota aio ao te tua ae te Public Health (Infectious Disease) Regulation ao te Disaster Risk Management and Climate Change Act ao babaire riki ake a na kaotinakoaki imwina ba e na bane n iraki nanoia irouia aomata.
14. Babaire riki tabeua irarikin aikai aika a katawe man kawaekoaki karaoakiila a na kona ni bon ti tuangaki naba bureitiman ao ana taan mwakuri te Tautaeka ake a mwiokoaki bwa a na karaoi nanoia ni kaineti ma taabo tabeua ke aomata ke mwakuri nako ao a mwaiti riki ake a noraki riaina ni karaoaki ibukin kakoroan nanon te Oota aio ma te tua ae te Public Health (Infectious Disease) Regulation ao te Disaster Risk Management and Climate Change Act ni kaineti ma te COVID-19.
15. Aki iran nanon te Oota ma tuua aikai bon uruan te tua ao a na kona bureitiman ni katikiko ao ni kamatawarikiko. Ko na kona naba n anganaki te tua n te tai naba are ko urua nanon te Oota aio (spot fine) irouia bureitiman n te mwaiti ae \$100 are ko na kabwaka nakon te Aobiti ni Mwane I Bairiki inanon 14 te bong man te tai are ko anganaki iai te beba n tua aio bwa ngkana ko aki ao

ko na uotaki nakon te kabowi ibukin am bure iaan te Oota aio. Ibukin buokan te matata ao uruan nanon kainibaire ake inanon te Public Health (Infectious Disease) Regulation bon te bure naba iaan te tua.

16. Ngkana iai te kaokoro ke te aki matata n te oota ae koreaki n te taetae n Kiribati aio ma te Oota are koreaki ke n rairaki nakon te taetae n Imatang, ao e na riai n iraki nanon te Oota are e koreaki n te taetae n Kiribati aio.

17. Te tua aio e kamaunai Oota ake a tia n karoaki mai imwaina ni kaineti ma te Aoraki ae te COVID-19 ao e na moa bwainakina man te Kanimabong 18 ni Maati 2022 man te aoa 6 n te ingabong ni karokoa 1 n Eberi, 2022 n te aoa 5 n te ingabong.

Dated 17<sup>th</sup> March 2022

**HE TANETI MAAMAU**

TE BERETITENTI

Printed by exhibition at the Office of Te Beretitenti on 17<sup>th</sup> March 2022.

**DR. NAOMI BIRIBO**

SECRETARY TO THE CABINET